

CADASIA YACNOCQUIDON ISTE

Pabadon tauamboen chiaid

¹ Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemenëdaid Nuquin Papantsen: —Con mado Esus chuibeneta —caidquo nebi. ² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. ³ Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴ Matses bëdambo icmequid Esus nec. —Ëbi tantiesabo tabadachimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquo icnuec abided cuidadec Esus unëspac caondash. ⁵ Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶ —Esus tantienquo yanosh —quequin mimbi naid chuisho tantiasho shubitiadquo iccobi. ¿Ëbi chonobida badedquo Esus

tantienquoio yano? Nuquin Papan tantiamiac
 abided ciudadec unësaid Esus tantiec mibi
 tabadondac. Aden Nuquin Papa aton Mado
 Esusbëdta tantiaboedëmbi ¿nëbida Nuquin
 Papa tantienquoio yano? Utsibon icsamboen
 chiaquien mimbi Esus tantienquoio yanac.
⁷ ¿Aidon chiaidta bëdambo icpec? Aidon chiaid
 ma Nuquin Papan chiaidpenquoio neyoc.
 Esusquoio chienquoio icquin muaquin chuisho
 tantiashun: —Abimboen cachitec —queshun
 mimbi Esus tantienquoio yampac. ⁸—Aton Mado
 Esusuidtsëqui tantiasho Nuquin Papan nuqui
 bëdamboen isec —quequin abimbo chiondambi.
 —Nuquin Papan chiaid abimbo chienquoio
 icsho Nuquin Papan cuidpashuni —quequin
 aden abimbo chiondambi. Nuquin Papan abi
 yacnoshon uaid mayan bëdantsen muaquin
 chuisho tantiashun aidtsen: —Nuquin Papan
 cuidpashun —catsiambi. Utsibontsen muaquin
 chuisho tantiash aidotsen: —Cuidpashun —
 quiobi. ⁹ Tania. Adembidi mibi chuinu. Ëmbi
 chuibanac mimbi Esus tantiabenondac. Mimbi
 tantiondaid Esusquoio chienquoio icsho: —Nuquin
 Papan cuidpashun —caimbi mibi muauaquin
 chuiquido. ¹⁰ —¿Matsesën: “Mibi bëdambo iquec,”
 mabi canu —quequindambi aden chuibampadi?
 Padenquoio. Nuquin Papan chiacpadomboen
 mambi natiadquoio yoc. —Bëdambo iquec —
 Nuquin Papa camenuen mambi chuibampaboc.
 Matsesën chiacpadomboenuidi natiapimbo
 iquebi. Adenuidi naic Esuquidistun yuambo
 ictiapimbo ictsiabi.

Esusën chiaidquo chiec nebi, quiaid

¹¹ Tantia, con utsibo. Mibitedi chuinu. — Esus tantiasho Nuquin Papan matses bēdamboen isbentsiash —quequin ëmbi chuiboed amben chiaidpenquo nec. ¹² Matsesën chiabi Esuquidistun tantiamiac ambi chiaidquo chuibanombi.

¹³ Tantia. Aden Esusën ëbi tantiamiondaid mibi chuinu. Con matses isadaidbon chiacpadomboenuidi natiadquo icquin Nuquin Papa tantiesabo danquin Esus tantiaquido comapenen chieshënquin cuesun secatiadquo icpadenebi. Ëmbi adodened ëmbi chuisho mimbi tantiondac. ¹⁴ Nuquin Papa tantiatiadquo icquin con matsesën chiaid abitedimbo natiadquo ictenebi. Ëbēdta tishaidon caniabon bēdiactsēc natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshēdenembi.

¹⁵ Adshobini Nuquin Papan aton Mado Esus tantiamiondash. Ëbi tishabi icnubi ëbi caic: — Con Mado Esus tantiameshun bēdamboen isquin

¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Ësusën chiaid ëbi chui —quequin matses chiambo iccondambi. ¹⁷ Shubu dadpen icquid Edusaden caid yacnocquido Esusbēd icnēdaido ambia Esus chuibanēdaido chuitanambo iccondambi. Utsibo chienquo yec nidaid utsi Adabia caid yacno matses nibēdacno badedquo nidtanondabi. Adashic yuec-yuecpambo ictanec auëshquo choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsęc chotsec-nuc matametaneć Edusaden yacno Petedo isec nidtanondabi. Adec nidash 15tedec ushec aidbęd tabadondabi. ¹⁹ Ambobi Nuquin Icbo Esusęn utsi Acobo caid isondambi. Esusbęd icnędaid utsi isambo iccondambi. Aid daędtsęqui isondambi. Utsibo padambo. ²⁰ Abimbo chuiquin nęid dada uaic nebi. Ęmbi aden chuibansho tantiash: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auęshquoio nidshun nidaid utsi Sidisia caid yacno istanondambi.

²² Nidaid utsi Udeya caid yacno Esusbęd icnędaido yacno yuec tabadambo iccondabi. Adsho anocquidon Esus tantiaquidon isabi iccondashi.

²³ Ęmbi naid chuishouidi tantiapac caondash. —Nuquipadquid Esus tantiaquido cuesun secatiadquoio icnędaidęmbi Esus tantiabenshun Esusquoio chuibeniosh —quequin ęmbi naid chuishouidi tantiapac caondash. ²⁴ Aden ęmbi naid chuisho tantiash: —Nuquin Papan nac Pabado będambo iquec. Adomboen Pabado tantiamec Nuquin Papa będamboshę iquec —quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Ębędi Bednabe caid nidpondash. Titotsen buanondambi.

² Adec Nuquin Papan tantiamiapadec ambo nidshun Esus tantiaquido chuiquid dapabo

caidoidtsëqui cho-chomeshun ëmbi naboed
 chuibanondambi. —Ëmbi chiabi yac aidon:
 “Muequi neque. Pabadon chuisho tantienda,”
 canushe —qeshun naden chiondambi. —
 Nuquin matsespenquo isadaidpembo matses
 utsibo Esusquo chuibeniombi. “Esusuidi
 tantiasho Nuquin Papan nuqui bëdamboen
 istsiash,” quequin chuibeniombi. ¿Adembidida
 mimbi tantiape? —capondambi Esus tantiaquido
 chuiquid dapabo chuiquin. Ëmbi adoac: —
 Ai, adembidi tantiemi —quepondash aido.
³ Èbëd icquid Tito caid isadaidpembo icshobi:
 —Shui dëbid dëteshune —cainquo iccondash
 chuiquid dapabon abi utsibon: —Adotiad —
 canubi. ⁴ Adec: —Shui dëbidien dëteshunetiad
 —quequido Esus tantiaquid damianquiec Esus
 tantiaquidombo tabadacno puduedpondash.
 —Esus tantiaquidon: “Esusuidtsëqui tantiasho
 Nuquin Papan nuqui bëdamboen isec,” quequin
 con tsusedpan chiaid niacsho tantianu —
 quiash ëbi yacno puduedpondash. Adec
 puduedshun tantiashic: —Mimbi icsamboen
 chiec. Nuquin tsusedpa Moisesën chiampidtedi
 nasho Nuquin Papan bëdamboen istsiash —
 quepondash. ⁵ Adec aido: —Nuquin tsusedpan
 chiampicpadomboenuidien nametiad —qesho:
 —Padi. Mimbi icsamboen chiec —quequin aidën
 chiapadomboen nainquo iccondambi. —Ma
 matses utsibon: “Esusënuidtsëqui Nuquin Papa ëbi
 bëdamboen ismec,” quequin ma Esusquo tantianu
 —qeshun nainquo iccondambi.

⁶ Aden Esus tantiaquido chuiquid dapa caidon

Esus tantiaquidën natequid utsi chienquo iccondashi. —Esus tantiabenacsho isun nuquin tsusedpan chiacpadomboentsen nameta — quequin chienquo iccondashi. ¿Esusbëd icnëdaidën: —Moisesën chiaidtsen nameta —cactambi nametsemponda? Padenquo ictsenondambi. ¿Atotsi Nuquin Papan aido capec? —Esusbëd iccondaaidquo neque. Bëdamboen isnu —¿capenda iquec? Padenquo. ⁷ Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusën naid chuibeniac. Nuquin Papan chiacpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bëdamboen nac —capondashi. ⁸ —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac ⁹ —qeshun bëdamboen ispondashi. —Adembidi nanuna. Mimbi isadaidpembo Esusën naid chuibenenubi adembidi isadaidbombo chuibenendambi — quepondash. Adshumbic: —Esus tantiaquidquo mibi nec —qeshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidtedishun chuiquid dapabo icquin adondashi. ¹⁰ Nadentsen chuipondashi. —Aton na nibëdquido bëdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquio icsashobimbi bëisquioquin chushcapondac. ¹² Abëdtan Esus tantiaquido matses utsibon codocaid pec bëdamboec tabadboedi aton pete isuidanec aïdobëd cuëshëdec Petedo icsapondash. Ambo choash Esus tantiaquido con matsesëmpenquio codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aïdo cho-chosho isash: —Moisesën chiampid niacquin matses utsin codocaid pesho chushcanushe —quec dacuëdquin isadaïdpembon pete meniaïd isuidampondash Petedon. Adec abëdtan Esus tantiaquido matses utsibobëd cuëshëdec icsapondash. ¹³ Adsho isash anocquido isadaïdbotsen abëdtan Esus tantiaquido matses utsibobëd tabadenquio yec cuëshëdpondash. Adsho isash ëbëd icquid Bednabetsen adecbidi cuëshëdec icsapondash. ¹⁴ Adec icsaquin Esusën chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bëdamboen naoque? Tantia. Chuinu. Isadaïdbo tsusedpan chiaïd matses utsibo mimbi namec. Isadaïdbo icquimbi matses utsibon codocaid pec aïdbëdi mibi bëdamboec tabadoc. Aïdon piaïd pec bëdamboec tabadboedi nëbi aïdbëd mibi cuëshëdoc. Adsho isash mimbi nianaïdo: “Petedon matses isadaïdbo tabadacbimboec tabadshouïdien Nuquin Papan nuqui bëdamboen ischitotsiash,” quepec icsamboen chiec. Aden mimbi icsamboen

tantiameque. Tantia. ¿Atotsiequin mimbi naoque?
—capondambi Petedo chushcain.

Nuquin Papan bēdamboen iste chiaid

¹⁵ Naden con matses Petedo chiondambi. —“Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. ¹⁶ Adquid icquin: “Moisesēn chiaiduidi naquin Nuquin Papa bēdamboen ismembi,” quedenedi nēbi nuqui utsien chiec. “‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

¹⁷ Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” queshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio. ¹⁸ “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid

icboedi: “Padpiden con tsusedpabon chiaiduidi naquin Nuquin Papa bēdamboen ismembī,” queshun abi bēdamboen ismequidquio Esus tantienquio yequini icsambo icchitotsiac. ¹⁹ Con tsusedpa Moisesēn chiacdedi natiadquio ictenebi. Adquid bēdamboen iste danquin abitedi natiadquio icquimbi abitedi nainquio iccondambi. Adshun: “Moisesēn chiacdedi ambembi matsesēn natiapimbo iquec,” queshun ěmbimbo naid ěnondambi. Nēbini Esus tantiec Nuquin Papan chiacpadec tabadec. ²⁰ “Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquio yanondabi. Nēbi ěmbi tantiaidquio nainquio yec Esuquidistubēdi cuēshēdenquio yec bēdamboec tabadebi. “Ēbi tantiec ěbi cuidmenquio icnuec abided cuidadec unēsac caondash,” quequin tantiaashoeni Esusēmbi bēdamboec tabadquid icmec. ²¹ “Abided cuidadaid con Mado Esusuidi tantiaasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen itsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquio icnuec ěbided cuidadec unēsnu,” queboedi Esus padenquio ictsempanēdash —capondambi Petedo chuiquin.

3

Nuquin Papan aton Mayan tabadmiaid

¹ Tantia. —Cadasia yacnocquido piushbimboecquin tantienquo yanosh —quequin chuisho tantiaashun mibitedi chuinu. ¿Tsuntsin: —Tantienda —cac Esus tantienquo yano? —“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiaasho Nuquin Papan nuqui cuidenquo iquec —quequin mibi chuibanondambi. ¿Esus tantiatiapimboda ique? ² Mimbi tantiaid ēbi chui. Tantienu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēdi tabadanondash? Padenquo. Ēmbi chiondaid Esusquo mimbi tantiabensho isashien mibēdi tabadanondash. ³ ¿Pabiate shēcuē choquidida mibi nendac? Tantia. ¿Atotsieshun tantienquo ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquo yanecta mibi bēdamboec tabadpatsia? Mibembi bēdamboec tabadtiapimboen mibi iquec. ⁴ ¿Aden Nuquin Papan aton Mayan mibēdi tabadmiaid icquimbida Esus tantienquo yano? ⁵ Nuquin Papan aton Mayan mibēdi tabadmequin comapenen tantiaquin nacenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquo. Ēmbi chiondaidquo Esusquo tantiaasho Nuquin Papan aton Mayan mibēdi tabadmec.

Nuquin Papa tantiaquidquo Abadauan chiaid

⁶ ¿Tsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —queshun Nuquin Papan bēdamboen isbempampic. ⁷ Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiaشو Nuquin Papan bēdamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuipampic ēndenquimbo. “Abadauan, mibi unēsān yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiaشو bēdambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquio icsho ambi Abadauan bēdamboen isampicpadomboen nēbi aton Mado Esus tantiaشو Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquio icsho Nuquin Papan cuidendac. Aden ēnden Nuquin Papan chiaid dada uapampic. “Ambi chiactedi nainquio icsho Nuquin Papan cuidendac,” quepampic. ¹¹ —Ambembi Moisesēn chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquio. Ambi chiaid niacquidquidquio icsho bēdamboen istiapimbo icquin Nuquin Papan naden chuiquin

dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquidien Nuquin Papan bēdamboen isec,” quequin dada uamepampic. ¹² ¿Ēmbemi Moisesēn chiactedimbo nanuequidta Nuquin Papambo tantiec tabadpec? Padenquo. “Moisesēn chiactedi naquid Nuquin Papabēd tabadendac,” quequin chiampicpaden ambemi matsesēn natiapimbo iquec. Natiapimbo icsho Nuquin Papan bēdamboen istiapimbo iquec.

¹³ Aden Nuquin Papan matses abitedimbo bēdamboen istiapimbo icnuc Esuquidistu: —Ēbided cuidshun ēbi tantiaquido ma con Pan cuidenquo icnu —quiash abided cuidadec unēspac caondash cuesten dectanac. Aidquo chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquo nec,” quequin Nuquin Papan chiaid dada uapampic. ¹⁴ Adec matses utsi-utsien abi tantiaquido cuidmenquo icnuec abided cuidadec Esus unēspac caondash. Ēndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēspac caondash.

Abadauamba chuishun Moisesetsen Nuquin Papan chiaid

¹⁵ Tantia, con utsibo. Mibitedi chuinu. Min matsesēn nadoquid. —Naden naindambi —quequin dada uashun: —“Abimbo chiaidquo nec,” ma isquidon canu —queshun abi

cuëmëdquidtsen dada uaquid. Aid dada uaid
dada uaquidbëdtambi utsintsen utsi uatiapimbo
icquid: —Chuiquidën cuidnushe —qeshun.
Adembidi ambi chiaid utsi uatiapimbo icquid
icquin ¹⁶ Nuquin Papan: —Nadomboen
naindambi —quequin Abadauan chuipampic.
—Mibi nibëdanan yuecquimbo ictaneshun
min tsyuecquid abentsëcshun matses bëdambo
icmendac —quepampic. —Min tsyuecquid
abentsëc tantiaquidtedi bëdamboen isendambi
—quequin tantiec adpampic. Esus caiqui: —
Min tsyuecquid abentsëc —quec adpampic. —
Min matses tsyuecquido dadpen —quenquo
icpampic. ¹⁷ ¿Ada tantie? Ëndenquimboshë
Nuquin Papan Abadauan chuiquin: —Min
tsyuecquidën matses bëdambo icmendac —
capampic. Adshumbic yuecquio ictaneshun seta
dadpenquo 430ted matameshun Moises utsitsen
chuiquin Nuquin Papan dada uamepampic.
Ambi Abadauan chiampid niaquenquo icquin
Nuquin Papan ambi chiaid utsi Moises dada
uamepampic. Muenquo icquin Abadauan
chuipampic. ¹⁸ ¿—Ëmbi chiaid ëmbi Moises dada
uamiacpadoomboen nashouidi mibi bëdamboen
isembi —qeshunda Nuquin Papan Abadauan
bëdamboen isbempampic? Padenquo. Moises
tishabi icnuc ambi chiac: —Nuquin Papan
abimbo caic—abi casho Nuquin Papan Abadauan
bëdamboen isbempampic. Adashic: —Yuecshun
min tsyuecquidën matses bëdambo icmendac
—quepampic. Aden ambi ëndenquimboshë
chiampicpadoomboen nëbi matses bëdambo

icmequin Esus tantiaquido Nuquin Papan bēdamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ĕmbi chiaid isash: “Icsamboequien nuqui tabadchitec,” quequin ma matsesēn tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chiuuampampic. Adoac Moisesēn aton matses Nuquin Papan chiaid chuibampampic.
²⁰ Nuquin Papanquo Abadauan chuipampic. Abadauan caic: —Chuitan —cainquo icquin Nuquin Papanquo Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquinda Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —queshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ĕmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. ²² —Ĕmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacbimboec abembi

bēdambo ictiapimboen icchitec,” quequin ma matsesēn tantianu —queshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidoudtsēqui Nuquin Papan bēdamboen isec.

²³ Esus choabi icnuc nadquo matses icpanēdash. Moisesēn chiacpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yachimboec aidēn chiacpadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. ²⁴ Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bēdamboen isec icsaisabimboecnuc —nuqui quendac. ²⁵ Aden tantiec: —Isadaidbo tsusedpan chiatedi nashouidi Nuquin Papan matses bēdamboen istsiash —quenquo nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec. ²⁷ Adec: —Esus tantiaquid nebi —quesho acten mentoaid yec Esuspadquo ictiadquo nuqui

iquec. ²⁸ Aden Esus tantiasho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec. ²⁹ Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

4

Yuabimboecquid isadaidbo yaid

¹ Tanta, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsān con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsān caniabi yec utsibon yuabimboec aton mado iquec. ² Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquo yanendac. ³ Adquo yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquo icpanēdash.

—Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash. ⁴ Adnubien ambi ĕndenquimbo tantiampicpadēn Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanēdash. ⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquio icnuec abided ciudadec Esus unēsac caondash. Nēbi Esus tantiasho: —Con mado mibi nec. Con champi mibi nec —quequin Nuquin Papan nuqui bēdamboen isec.

⁶ Adec: —Con bacuēbo nec —queshun Nuquin Papan nuquibēdi Esusēn Mayan tabadmec. Adoac bacuēn amē: —Ēbi, papa —cacbimboen Nuquin Papa nuqui chianec. ⁷ Esus tantiabi Moisesēn dada uapampiduidi namenuequido yuabimboecquido icboedi nēbi Esus tantiasho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tantia. Nēbi matses utsibo mibi chuioanu. Ēnden Nuquin Papambo tantiesa icquin matses uaquidpenquiobi utsi mimbi tantiapanēdac. Papa quequin mimbi tantianēdaidēn yuabo yec mētaniacimboecquido mibi icpanēdac. ⁹ Nēbi Nuquin Papa mimbi tantiabenondac. ¿Mimbembida adonda? Padenquio. Aidēmbi mibi tantiamepanēdash. Aidēn tantiamiaidombo

icquin ¿atotsiequin aid tantienquo yanoai?
 ¿Moisesën dada uapampiduidi namenuequido
 tanshoda Nuquin Papan mibi bëdamboen ispec?
 Padenquo. Adquid mëtaniacimboecquid nec.
 ¿Mëtaniacimboecquid icoatiadquioda ique?
¹⁰ Aden Nuquin Papa tantienquo icquin
 mimbi icsamboen chiec. —Aid badiadën
 adenda. Aid inchëshën ushën adenda. Aid
 setambi adenuidtsëqui nanuna. Nuquin Papan
 cuidnushe —quequin mimbi icsamboen chiec.
 Mimbi chiacpadomboen naquid Nuquin Papan
 bëdamboen iste danquin mimbi icsamboen
 chiec. ¹¹ Mibi caic: —Adosh —quesho tantiash
 shubitiadquo iquebi. —¿Ëmbi chiondaidonda
 Esus tantienquo yampash? —quequin tantiac
 mibi unësquo iquec.

¹² Con utsibobimboecquido mibi neque. Tantia.
 Mibitedi chuinu. Isadaidpembo yec mibi:
 —Moisesën chiampiduidi nanu —quenquo
 yacimboec yanondabi. —Ëmbembi Moisesën
 chiampid naquin Nuquin Papa bëdamboen
 ismembi —quedenedi ënëdondabi. Nëbi Esusuidi
 tantiaquid nebi. Adembidi Esusuidi tantiata.

Ëbi adsho tantiash chieshenda. Tauamboen
 ëmbi Esus chuisho mimbi ëbi chieshënenquo
 iccondac. ¹³ Mibi yacno tauamboec choshon
 daicsabudtsëcshumbi mibi Esusën naid
 chuibanondambi. ¹⁴ Istiapicpambo yec
 daicsabudacshobi mimbi ëbi cacumenquo
 iccondac. Ëbi mibi yacno puduedsho isash
 mibi cuishonquiondac. Nuquin Papan abi
 yacnoshon uaid mayan bëda choacimboecnuc
 mibi cuishonquiondac. Nuquin Icho Esuquidistu

choachimboecnubidi mibi adondac. ¹⁵ —Min
 ësšē chicshun ëbi mene —ëmbi cac mimbi ëbi
 menetsenondac. Aden ëbi mimbi tantiaquiondac.
 Adondaiddi ¿atotsi quiash chieshcueno? ¹⁶ ¿Nëid
 abimbo chuiquindambi mibi chieshëmpe?
 Padenquo iquemi. ¿Aden chuisho mimbidabi
 chieshëmpe?

¹⁷ Ista. Esus chienquo icquidon ambi
 chiacpadomboen mibi nametiadquo
 iqueque. ¿Mibi tantiaquioquin bëdamboen
 namenuenda mibi chuipec? Padenquo. Èbi
 chieshëmenuembien ambi chiacpadomboen
 mibi nametiadquo icchitec. Mibi abibi
 tantiamenuen naic. ¹⁸ Èmbien mibi tantiaquin
 Nuquin Papan chiacpadomboen namenuen
 yuen chuibanondambi. Aden chuibanac
 mimbi ëmbi chiaidquo tantiabenondac. Èbëd
 icquimbi Esus bëdamboen tantiaboedombi ëbi
 nidtsëcnubi mimbi badedi utsi tantiac. ¹⁹ Aden
 mimbi naid tantiac mibi unësquo iquec. Anin
 bacuë tantiachimboen mibi tantiaquiemi.
 —Esubimboec icpashun. Aid tantiec ambi
 chiacpadec bëdamboec tabadpashun —quequin
 mibi tantiemi. ²⁰ Mibëd icquin bëisquoquin mibi
 chuitsiambi. Mibëd iquenquo icquimbi mibi
 bëisquoquin chiachimboen dada uaquin mibi
 naden chiemi. —¿Atotsieshun Esus tantienquo
 yanoao? —caimbi.

Abaduanën mado daëd chiaid

²¹ ¿—Moisesën chiacpadomboenuidi naquin
 Nuquin Papa bëdamboen ismembi —quequido
 icquinda mimbi Moisesën chiampid bëdamboen

tantieque? Tantia. Mibi chuinu. ²² Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquo aton chidon tishaid abentsëcbidi icpampic. ²³ Abadauanën chudac badedquo bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac — quequin ambi chiacpadomboen Nuquin Papan naidopenquo icmiac aton mado tishpampic. ²⁴⁻²⁵ Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquo yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidëshun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: — Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶ Edusaden caid utsi iquec. Nuquin Papa tabadacnombo Edusaden caopec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. ²⁷ Nuquin Papan ambi chiaid dada uamepampicpadec Esus tantiaquido dadpenquo iquendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bēdambo icta.

Bacuë paēmbo icnuc tishacmaid yequi cuishon-
queta.

Bēnē choquidēn bacuë dadpen tishquidēn bacuēn
tsyuecquido daēdpactsēc yanubi

Bacuë nibēdquidēn min matses dadpenquioshē ya-
nendac,”

quequin ambi chiaid Nuquin Papan dada
uamepampic.

²⁸ Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidēn tishaid Isac cuēmēdquidēn tsyuecquid tantiaquido bēdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. ²⁹ Ēnden Nuquin Papan naidopenquio icmiampidēn mado chieshēnquin chido yuaidēn madon aton utsibi chieshēmpampic. Adembidi Nuquin Papan Mayanēn tantiamiaido Esus tantiaquido Moisesēn dada uapampiduidi namenuequidon chieshēnendac.

³⁰ Aden Abadauanēn mado bēyucquidēn aton utsi chieshēnsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobēdtabi cueme. Min mado utsi Sada madon tsyuecquido dadpenquio caidmequin bēdamboen tabadmembī. Yuaidēn madoembi padenquio iquendac,” quequin Nuquin Papan Abadauan chiaid dada uapampic Moisesēn. ³¹ Sada caidēn mado Isac caidpadquid yuapenquio nuqui nec. Esus tantiasho Nuquin Papan: —Con mado

mibi nec. Con champi mibi nec —nuqui caic. —Esusēnuidtsēqui Nuquin Papa ēbi bēdamboen ismec —quequin Esusquo tantiaquid yec: — Ĕmbembi Moisesēn chiactedi naquin Nuquin Papa bēdamboen ismembi —quenquo icnuna.

5

Esus tantiasho Nuquin Papan bēdamboen iste chaid

¹ Aden: —Esusēnuidtsēqui Nuquin Papa ēbi bēdamboen ismec —matses camenuc abided cuidadec Esus unēspac caondashe. Aidquo tantiata. Muaquidēn: —Moisesēn chiampicpaden nasho Nuquin Papan nuqui bēdamboen istsiashē. Aidēn chiapaden nanuna —quequin chuisho tantienda. Aden muaquin chiapaden naic isadaidbo tsusedpan yuabimboec mibi yantsiaque.

² Mimbi isonaid Pabado nebique. Tantia. Mibitedi chuinu. Moisesēn chiactedi naquid Nuquin Papan bēdamboen iste danquin Esus tantienquo yanec muaquidēn chiapadec shui dēbid dēteshuniadacsho isun Esusēn Nuquin Papa mibi bēdamboen ismetiapimbo ictsiashē. Adenda. ³ Aden Moisesēn chiaid abentsēc natsēcshun aidēn chiaid utsitedi nainquo icsho Nuquin Papan mibi bēdamboen istiapimbo ictsiashē. Moisesēn dada uapampiduidi namenuquido tanenda. ⁴ Aido Esus tantiesabo nec. Aden abi bēdamboec ismianquid Esus tantienquo icsho Nuquin Papan aido bēdamboen istiapimbo iquec. ⁵ Esus tantiaquidoen Nuquin Papan Mayanēn tantiamiacpaden naden

tantie. —Esus tantiashouidi ambi chiaid niac-niacacmaidbimboecnuc bēdamboen isquin Nuquin Papan: “Mibi bēdambo iquec,” nuqui caindac —quequin nuqui tantiec. ⁶ Shui dēbid dēteshunaidēn Esus tantiasho Nuquin Papan bēdamboen isec. Adembidi shui dēbid dētiacmaidontsen Esus tantiasho Nuquin Papan bēdamboen isoaic. Aden Esus tantiabenash: —Ambi chiacpadomboen Nuquin Papan matses tantiaquid ēbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancacbimboen aiduidtsēqui tantiaquin mimbi Esusquo tantiondac. ¿Tsuntsin muaquin chiac Esus tantienquo mimbi yanoape? ¿Atotsiequin abimbo chiaid niace? ⁸ ¿Nuquin Papan nacta Esus tantienquo yano? Padenquo. Ma aidēmbi mibi Esus tantiametiadquo yoc. ⁹ Muaquido tantienda. Nadquo aid iquec. Tosho bedquid abentsēcshun bedmebanac abitedi toshoquecuededec. Adembidi muaquid abentsēcshun chiac matses dadpenshun abimbo tantienquo yantsiashe. Muaid tantienda.

¹⁰ —Nuquin Icho Esusēn tantiamiac ēmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiacpaden shui dēbid dēteshunaiduidtsēqui Nuquin Papan bēdamboen ist-siash,” queposh Pabado —quequin ¿tsundanquieni muauapac caosh? ¿Adendambi chuidio? Aden ēmbi chuisho adembidi chuiquidon chieshēnenquo ict-

senoshi. Esus chienquoio icsho ëbi chieshënenquoio ictsenosh. Abi tantiaquid cuidmenquoio icnuec abided cuidadec unësaid Esusuidi chuisho mabi chieshëmpaboc. ¹² Mibi muaquin chuiquido Moisesën dada uapampiduidi namenuequido caic: — Auëshquoio cuemepashun —caimbi.

Esus tantiaquido bëdamboec tabadte chiaid

¹³ —Ëbi cuidmenquoio icnuec abided cuidadec unësaid Esusquoio tantiasho Nuquin Papan ëbi bëdamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ëbi icsate bunaid nanu —quenda. Nëbi Esus tantiaquin mibi icsate bunaid ënquin mëmunta. Esus tantiaquido yec tantiananquiec nashunanta. ¹⁴ Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacbimboen utsibotsen bëdamboen tantiaquiota,” quequin Nuquin Papan ambi chiaid Moises dada uamepampic. ¹⁵ — Opa penantiadpambo yacbimboec nëishnanash chushcananosh —quiosh mibi caic. Aden naic mibi icsacuededeque. Esus tantienquoio mimbi yaneque. Bëdamboec tabadta.

Nuquin Papan Mayanën bëdamboen tabadmete

¹⁶ Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mimbi nainquoio ictsiac. ¹⁷ Nuqui icsate bunaid naiqui Nuquin Papan Mayanën tantiamiacpadec bëdamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate

bunaid ënquin nuqui mëmuntsiac. ¹⁸ Nuquin Papan Mayanën tantiamiacpadomboen tantiec: —Ësusënuidtsëqui Nuquin Papa ëbi bëdamboen ismec —queshun: —Moisesën chiactedimbo naquin ëmbimbo Nuquin Papa bëdamboen ismembi —quequin tantienquo nuqui iquec.

¹⁹ Nadquo icsateuidi bunquid matses iqueque. Tantia. Chuinu. Nëidic aton chidopenquo chudquido. Nëidic aton bënëpenquo chudmequido. Nëidic dada daëd chichudnanquido. Nëidic opabimboec chudnante bunquin matses ismequin adoquido. Nëidic tsienbëdta shui chuibudquin icsamete bunquido.

²⁰ Nëidic Nuquin Papan chiaid niac-niacquin ambi matsesbimboecnuc nacnenaïdi papa caquido. Nëidic nënëchoquido. Nëidic dauë icsa bedash icsa uanquido. Nëidic chieshëmënquido. Nëidic chieshëmë nec chushcananquido. Nëidic cudasquido. Nëidic nëishëmënquido. Nëidic ambi naiduidi naquido. Nëidic abitedi cuësh-cuëshëdmianquido. Nëidic: —Utsin chiaid tantiatiapimbo iquebi. Ëmbentsëqui bëdamboen chiembi —quequido. ²¹ Nëidic utsin na natiambo bunec chieshëmënquido. Nëidic tantiadenuen paëmbo icquid acquido. Inchëshën ushenquo icquin adoquido. Adquidtedishun icsamboen naic. Adec abi icsaid ëntiapimbo yec unësash Nuquin Papa yacno tabadtiapimbo iquec. Aden mibi chuibanondambi ënden.

²² Padnuen Nuquin Papan Mayanën namiaid yec nadquiec tabadquid. Nuquin Papabëdta matses tantiaquiec tabadquid. Ësus tantiec cuishonquec tabadquid. —Nuquin

Papan ëbi bēdamboen isec —quec bēdambo yec dacuēdenquoio yec tabadquid. Utsibon chieshēnaqui chieshēmēnenquoio yec tabadquid. Nēishēmēnenquoio yec tabadquid. Bēdamboen isquin utsibo nashunec tabadquid. Muainquoio yec tabadquid Nuquin Papan namiaid. ²³ — Con nauidi naimbi. Èbiuidtsēqui bēdambo iquec —quenquoio icquin utsibo bēdamboen tantiec tabadquid. Abi icsate bunaid ēnquin mēmunc tabadquid. Adquoio yec Nuquin Papan Mayanēn namiaido Esus tantiaquido bēdamboec tabadtsiash. ¿Adec bēdamboec tabadsho isunda: —Adec tabadenda —quequin Nuquin Papan Moises dada uamepampic? Padenquoio. — Icsamboec tabadenda —quequin icsamboec tabadquid chuiampic. Nuquin Papan Mayanēn tantiamiacpadec tabadquin aden chuiampid nuqui niaquenquoio iquec. ²⁴ Adoenquoio icquin cuesten dectanac abided ciudadec unēsaid Esus tantiaquin nuqui icsate bunaid ēnquin nuqui mēmuntsiac. ²⁵ Aden icsamboen nainquoio yec bēdambo icnuna. Nuquin Papan Mayanēn Esus tantiamiaid icquin aidēn tantiamiacpadomboen nanuna.

²⁶—Èbiuidtsēqui bēdambo iquec —quenda. Adenquoio yec nuqui chuiquid dēniacte bunenquoio yec bēdamboec tabadnuna. —Èbi bunacpaden ëbi namianenquien icchitec. Utsien namechitec — quec chieshēmēnec tabadenda. Nēishnanenquoio yec bēdamboec tabadnuna.

6

Esus tantiaquido bēdamboec isnante chiaid

¹ ¿Nuquin Papan Mayanën tantiamiacpadomboen bēdamboen tantiaquidta icpec? Adquidēn abēdtan Esus tantiaquidēn icsamboen nasho isun: —Padi. Esus tantiaquid adesambo neque. Bēdamboec tabadta —caquid yendac. —Nēishec ēbitsen icsamane —queshun nēishenquio icquin aden chuiquid yendac. Abibi datantiadec: —Icsaquid nebi. Esus bēdamboen tantienquio yec adecbidi icsatsiabi —quequin tantiec: —Bēdamboec tabadta —quequid yendac. ² Adec bēdamboec isnanec: —Bēdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

³ Utsien: —Utsibēd onquetiapimbo iquebi. Ēbiuidtsēqui bēdambo iquebi —quec abibi muauadquid icsambo iquec. ⁴ Adenquio yec mibibi datantiadta. —¿Nuquin Papan chiacpadectabi bēdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bēdambo icta. —Utsitedi icsambo icnubi ēbiuidtsēqui bēdambo iquebi —quenda. ⁵ ¿Mimbi utsibon naid chuibanshoda Nuquin Papan: —Mibi bēdambo iquec —capatsiash? Padenquio. Mimbi bēdamboen naid isun: —Mibi bēdambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷ Piacbo sequidbimboec matses iquec. Tantienquio icquidēn icbompin uestsaidi siac canienquio ictsiash. Padnuen tantiaquidēn ēshē bēdaidquio siac bēdamboec canitsiash. Tantienquio

icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unēsash Nuquin Papa yacno nidendac. Ēbi adsho tantiash: —Icsaido Nuquin Papan cuidenquo ictsias — quec muaic tabadenda. Ambi chiacpadomboen mibi cuidendac. ⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiacpadomboen naquidien bēdamboec tabadec unēsash Nuquin Papa yacno tabadendac. ⁹ Ēmbi aden chuisho tantiash bēdamboec tabadta. Bēdamboec tabadec chieshtoenquo icsho isun ambi tantiacpadën Nuquin Papan abēdi nuqui tabadmendac. ¹⁰ Adec bēdamboec tabadquin utsibo bēdamboen isquin nashununa. Aden utsibo bēdiactsēc tantiec Esus tantiaquido yec tantiananquiec nashunanquionona. —Shubu abentsēquën tabadquidobimboec Esus tantiaquido iquec — qeshun adonona.

Pabadon ěnquimbi chiaid

¹¹ Is. Nua-nua icnuc dada uaquin ěmbimbo ěnquimbi dada uanu. ¹² Muaquin chuiquidon mibi con tsusedpan chiacpadomboenuidi nametiadquo iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometiadquo iqueque. — Esusuidi chuisho con matsesën chieshënquin cuidnushe. Moisesën chiacpadomboen namenu —quequin mibi shui dēbid dēteshunemetiadquo

icchitec. Aido muasho tantienda. ¹³ Aden mibi: —Adota —caquidombi Moisesën chiacdedi nainquien icchitec. Adquid yec: —Is. Bëdambo iquebique. Ëmbi chiacpadomboen nëidon naosh —quenuembien mibi shui dëbid dëteshunemetiadquio icchitec. Aidon chiacpadomboen nainda. ¹⁴ Ëbien adtiapimbo iquec. Esus tantiesabimboec: —Ëbibi bëdambo iquebi —quetiapimbo iquebi. Esusuidtsëqui bëdambo iquec. Abi tantiaquid cuidmenquio icnuec abided ciudadec unëspac caondash cuesten dectanac. —Aidquio tantiec bëdambo iquebi —caimbi. Aden Esus tantiec: —Ëmbimbo Moisesën chiacdedi naquin Nuquin Papa bëdamboen ismembi —quec ënëdondabi. Adecbidi Esus tantiec ëbi bunaid ënash icsate bunenquio iquebi. ¹⁵ —Moisesën chiacdedi naquiduidi Nuquin Papan bëdamboen istsiash —quetiapimbo iquebi. Shui dëbid dëteshuniaidëmbi Esus tantienquio icsho Nuquin Papan cuidtsiash. Adembidi shui dëbid dëtiacmaidën Esus tantienquio icshobidi cuidtsiash. Nuquin Papan Mayanën chuca uaidien Esus tantiaquid Nuquin Papan bëdamboen isquin bëdamboen tabadmec. ¹⁶ Ëmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bëdamboen isquin bëdambo icmepashun —caimbi. Adquido Nuquin Papan: —Con matsesquio nec —caindac.

¹⁷ —Abimbo chienquien icchitec —ëbi cainda. Esusën chiaidquio chiombi. Aidquio tantiaquin ambi chiacpadomboen nabanta. Ëmbi Esusën chiacpadomboen nasho isun chieshënquin cuesaniondashi. Cueson daid bish abi iquec. ¹⁸ Tantia,

con utsibo. Mibi Nuquin Papa chianembi naden.
—Mimbi nabocpadomboen con Icbo Esuquidis-
tubëdtan Cadasia yacnocquido bëdamboen ista,
Papa —quequin Nuquin Papa chianembi. Padi.
Aidtedi chuiquin dada uaombi.

Esuquidistu Chuiquin Tantiamente New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

446da786-5bd1-5ffa-85e2-9eff4052cf8b